

Ամփոփելով Սևան համայնքի 2022 թվականի բյուջեի կատարողականը

Սևան համայնքի ավագանին 2023թվականի փետրվարի 15-ին կայացած նիստի ժամանակ, ի թիվս օրակարգային այլ հարցերի, լսեց և հաստատեց Սևան համայնքի 2022թվականի բյուջեի կատարողականը:

Համաձայն ներկայացված ցուցանիշների՝ Սևան միավորված համայնքի 2022թ.-ի տարեկան բյուջեի եկամուտների /վարչական և ֆոնդային բյուջեները միասին/ պլանը կատարվել է 90.6%-ով: 2.326.9մլն. դրամ պլանային եկամուտների դիմաց հավաքագրած և պետական բյուջեից հատկացված դոտացիան կազմել է 2.107.7 մլն. դրամ, թերակատարումը կազմել է 219.2.0 մլն. դրամ, այդ թվում՝ վարչական բյուջեի գծով առկա է 7.0 մլն. դրամ եկամուտների գերակատարում, ֆոնդային բյուջեի գծով թերակատարումը կազմել է 239.5 մլն. դրամ: 2022թ.-ին Սևան համայնքի բյուջեի վարչական մասը կատարվել 100.5 %-ով / պլան՝ 1.456.3 մլն. դրամ, փաստացի՝ 1.463.3 մլն. դրամ/:

Վարչական բյուջեում սեփական եկամուտները կատարվել են 101.4%-ով /պլան՝ 475.6 մլն. դրամ, փաստացի՝ 482.4 մլն. դրամ/: Գերակատարումը կազմել է 6.8 մլն դրամ կամ 1.4 %: Հարկերի և տուրքերի հավաքագրման պլանը կատարվել է 105.9 %-ով: Հարկերի և տուրքերի հավաքագրման մեջ գերակատարվել է միայն գույքահարկ շենք-շինությունների գծով՝ 0.1 մլն. դրամի չափով, և փոխադրամիջոցների գույքահարկը՝ 123.1%-ով կամ 47.3 մլն. դրամի չափով, իսկ անշարժ գույքի հարկի, տեղական և պետական տուրքերի գծով առկա են պլանների թերակատարումներ 26.3 մլն. դրամի չափով: Ոչ հարկային եկամուտների մեջ գերակատարվել են ինքնակամ կառույցների օրինականացման, տեղական վճարների և այլ եկամուտների գծով եկամտատեսակները, իսկ ուսումնական, ծնողական վճարները և մնացած ոչ հարկային եկամուտների մասով առկա է թերակատարում: Հարկ է նշել, որ 2021 թ. հունվարի 1-ից գործողության մեջ է դրվել անշարժ գույքի հարկը, որը միավորել է նախկին գույքահարկը և հողի հարկը, ինչպես նաև առանձնացվել է փոխադրամիջոցների գույքահարկը ֆիզիկական և իրավաբանական անձանց գծով: Չնայած առկա բազմաթիվ անճշտություններին՝ ներդրված նոր ծրագրերն աշխատում են անխափան, զուգահեռ աշխատում է նաև գույքահարկերի նախկին ծրագրերը: Համայնքի ֆոնդային բյուջեի եկամուտները կատարվել են 80.3 %-ով / ճշտված պլան՝ 1.217.3 մլն. դրամ, փաստացի՝ 977.8մլն. դրամ /: Համայնքի ֆոնդային բյուջեի եկամուտների թերակատարման պատճառը օբյեկտիվ է՝ պայմանավորված համայնքում հողերի և հիմնական միջոցների օտարման բացակայությամբ:

2022թ.-ի տարվա ընթացքում ստացվել և ծախսվել է 2021թ. համար նախատեսված 81.2 մլն. դրամի սուբվենցիա: Հիմք ընդունելով եկամուտների կատարման ցուցանիշները՝ կատարվել են համայնքի 2022թ. տարեկան բյուջեի ծախսերը:

Համայնքի բյուջեի ծախսերը կատարվել են 90.1%-ով: 2 427.5մլն. դրամ պլանային ծախսերի դիմաց փաստացի կատարվել է 2.187.6 մլն. դրամի ծախս, կամ թերակատարումը կազմել է 239.9 մլն. դրամ, կամ 9.9% : Վարչական բյուջեի ծախսերը կատարվել են 98.7 %-ով (պլան՝ 1.457.9մլն. դրամ, փաստացի 1.439.0 մլն. դրամ), թերակատարումը կազմել է 18.9 մլն. դրամ:

Վարչական բյուջեի փաստացի ծախսերի 34.2%-ը կամ 492.7 մլն. դրամ կազմել են կրթության և մշակույթի ծախսերը, 368.5 մլն.դրամ՝ ընդհանուր բնույթի համայնքային ծառայությունները, 211.5մլն. դրամ՝ սանիտարական մաքրման ծախսեր:

Ըստ առանձին ոլորտների՝ համայնքի 2022թ. տարեկան բյուջեի ծախսերը կատարվել են հետևյալ չափերով՝ կրթության ծախսեր՝ 99.7%, մշակույթի ծախսեր՝ 99.3%, սանիտարական մաքրման ծախսեր՝ 99.9%: 2022թ. համայնքի բյուջեի ֆոնդային մասի ծախսերը կատարվել են 82.2%-ով (պլան՝ 1 316.4մլն. դրամ, փաստացի ծախս՝ 1.082.1մլն. դրամ): Համայնքի 2022թ. ֆոնդային բյուջեից վճարվել է 915.8 մլն. դրամ ասֆալտապատման, փոսային հիմնանորոգման համար, այդ թվում՝ նաև նախորդ տարիներից տեղափոխված պարտքեր:

Կառուցվել է 97.8 մլն. դրամի արտաքին լուսավորության ցանց: Համայնքի 2022թ.-ի ֆոնդային բյուջեով իրականացվել են բազմաթիվ ծրագրեր: Համայնքի բյուջեի միջոցներից ծրագրերի իրականացման նպատակով վճարվել է 596.1 մլն. դրամ: Պետական բյուջեից ստացվել և վճարվել է 486.0 մլն. դրամ: 2022թ. հունվարի 1-ի դրությամբ համայնքային պարտքերը կազմել են 34.7մլն. դրամ: 2022թ.-ի տարվա ընթացքում մարվել է 34.2 մլն. դրամ պարտք, այդ թվում՝ 25.1մլն. դրամ ճանապարհների հիմնանորոգման աշխատանքների մասով, որը տեղափոխվել է 2016թ.-ից: Սևան համայնքի միավորման արդյունքում նախկին գյուղական համայնքներից միավորված համայնք են տեղափոխվել 95.1 մլն. դրամ կապիտալ ծրագրերի և այլ գործառույթների գծով պարտքեր, որից մարվել է 82.0 մլն. դրամը: Մարման 63.2 մլն. դրամը կատարվել է ստացված սուբվենցիայի հաշվին, 18.8 մլն. դրամը՝ համայնքի բյուջեի հաշվին:

Վարչական բյուջեի գծով ընթացիկ բնույթի տեղափոխված բոլոր պարտքերը, այդ թվում՝ աշխատավարձի գծով, ամբողջությամբ մարվել և գրոյացվել են: 2022թ.-ի ընթացքում ավարտված, սակայն չֆինանսավորված մի շարք ծրագրերի ֆինանսավորումը տեղափոխվել է 2023թվական, որի արդյունքում առաջացել է 511.0 մլն. դրամի պարտք: 2023թ.-ի հունվարի 1-ի դրությամբ համայնքի ֆոնդային բյուջեի ընդհանուր պարտքը կազմում է 527.0 մլն. դրամ: